

Kalaallit Nunaanni nammineq aningaasartuutiginagu eqqartuussisulersuussisarneq pillugu nalunaarut

Kalaallit Nunaanni eqqartuussisarneq pillugu inatsimmi § 254, imm. 3 aamma § 256 naapertorlugit, tak. inatsit nr. 305, 30. april 2008-meersoq, aalajangersarneqarpoq:

§ 1. Nammineq aningaasartuutiginagu eqqartuussisulersuussineq pillugu aalajangiinerni isertitanit akileraarutit pillugit Inatsisartut inatsisaanni § 75 malillugu isertitat A-t aamma isertitanit akileraarutit 10.000 kr.-inik ilanngaasikkat pillugit Inatsisartut inatsisaanni § 74 malillugu isertitat B-t, tak. Kalaallit Nunaanni ingerlatseqatigiiffiit iluanaarutinit akileraarutaannit iluanaarutaasinnaasunit ilassutit ilanngullugit isertitaasa akileraarusernissaat pillugu Inatsisartut inatsisaanni § 21, imm. 1 malillugu assigiimmik ilanngaas, tak. isertitanit akileraarutit pillugit Inatsisartut inatsisaanni § 86, katinnerat isertitanut tunngavittut atorneqassaaq.

Imm. 2. Imm. 1 malillugu naatsorsuinerni ukiup siuliani isertitat inaarutaasumik naatsorsukkanit ersertut aamma ukiumi pineqartumi Kalaallit Nunaanni ingerlatseqatigiiffiit iluanaarutigisinnaasaannut uppernarsaatit malinneqassapput.

Imm. 3. Qinnuteqaateqartup isertitai tunngaviusut imm. 1 malillugu naatsorsorneranni 304.000 kr.-iuppata ikinneruppataluunniit Kalaallit Nunaanni eqqartuussisarnermik inatsimmi § 254 malillugu nammineq aningaasartuutiginagu eqqartuussisulersuussisoqarnissaa nalunaarutigineqarsinnaavoq. Qinnuteqaateqartoq inooqateqarpat aappariit ataatsimut isertitaat 386.000 kr.-iuppata ikinneruppataluunniit nammineq aningaasartuutiginagu eqqartuussisulersuussisoqassasoq nalunaarutigineqarsinnaavoq. Aappariit suliami akkerleriinnik soqutigisaqarpata, qinnuteqaateqartup nammineq isertitai aamma kisimiittut isertitaannut killiliussaq malinneqassaaq. Tak. Kalaallit Nunaanni eqqartuussisarnermik inatsimmi kapitali 27, aappariinneq imaluunniit angajoqqaatut oqartussaaneq pillugu suliani qinnuteqaateqartup nammineq isertitaannut aamma kisimiittut isertitaannut tunngatillugu killiliussaq aamma malinneqassaaq.

Imm. 4. Imm. 3-mi aningaasat meeqqanut tamanut 53.000 kr.-inik qaffanneqassapput, qitornassat qitornarsiallu 18 inorlugit ukiullit qinnuteqaateqartumi najugallit taassumangaluunniit pilersorneqarnerusut ilanngullugit eqqarsaatigalugit.

§ 2. Tunngaviusumik isertitat § 1, imm. 1 malillugu naatsorsorneranni qinnuteqaateqartup isertitai paasissutissiissutigeqquneqartunit allaanerungaatsiarpata massakkut isertitat tunngavigineqassapput. Tamannattaq qinnuteqaateqartup tunngaviusumik isertitaannut naatsorsorneqanngitsunut atuuppoq.

§ 3. Qinnuteqaateqartoq 18 inorlugit ukioqarpat angajoqqaat aningaasaqarnerat aammattaq eqqarsaatigineqassaaq.

§ 4. § 1 aamma § 2 apeqqutaatinnagit suliame aningaasartuutit pisarnermit annertunerunissaat missingersorneqarpat ileqqoq malinnagu nammineq aningaasartuutiginagu eqqartuussisulersuussinissaq nalunaarutigineqarsinnaavoq.

§ 5. Nammineq aningaasartuutiginagu eqqartuussisulersuussinissaq pillugu qinnuteqaateqartut arlariuppata suliame aningaasartuutit qinnuteqaateqartut ataatsimoorlutik akilersinnaaneraat aalajangiiniarnermi eqqarsaatigineqassaaq.

Imm. 2. Suliap inernera arlariinnut pingaaruteqarpat qinnuteqaateqartoq ataasiinnaagaluarpalluunniit tamannattaq atuutissaaq.

§ 6. Eqqartuussisulersuussinissamik qinnuteqaateqartup naammattunik tunngavissaqarneranik nalilersuinermi makku ilaatigut ilanngunneqassapput

- 1) Suliap qinnuteqaateqartumut pingaarutaa,
- 2) Qinnuteqaateqartup suliame taperserneqarnissaa ilimanarnermaq,
- 3) Suliame pineqartup annertussusia,
- 4) Aningaasartuutissatut naatsorsuutigisat annertussusiat,
- 5) Suliap allaffissornikkut suliarineqarsinnaanersoaq aamma
- 6) Suliap atuisartut naammagittaalliuuteqartarfiannit, ineqarneq pillugu naammagittaalliuuteqartarfimmit tamakkunungaluunniit assingusumik naammagittaalliuuteqartarfimmit aalajangiiffigineqarsinnaanersoaq.

§ 7. Akileraarutinut oqartussat 2013-mut inaarutaasumik naatsorsugaat ilanngullugit qinnuteqaateqartup nassiutissava. Qinnuteqaat december 2014-mi tunniunneqassappat taamatuttaaq 2013-mut inaarutaasumik naatsorsukkat ilanngunneqassapput. Qinnuteqaateqartoq inooqateqarpat inooqataasumut inaarutaasumik naatsorsukkat ilanngunneqassapput. Taamaattorli aappariit suliame akerleriinnik soqutigisaqarpata tamanna atuutissanngilaq.

Imm. 2. Ukiumi isertitaqarfimmi 2013-mi qinnuteqaateqartoq inooqataasorluunniit Kalaallit Nunaanni ingerlatseqatigiiffinit iluanaarutinik akileraarusigassanik tigusaqarsimanersoaq qinnuteqaateqartup paasissutissiissutigissavaa, tamaattoqarpallu tamatumunnga uppersaat ilanngunneqassaaq.

Imm. 3. Meeqqat amerlassusiat qinnuteqaateqartup paasissutissiissutigissavaa, qitornassat qitornarsiallu 18 inorlugit ukiullit qinnuteqaateqartumi najugallit imaluunniit taassumangga pilersorneqarnerusut ilanngullugit eqqarsaatigalugit.

Imm. 4. Inatsisitigut ikiorneqarnissamut sillimmasiisoqarsimanersoaq qinnuteqaateqartup paasissutissiissutigissavaa taamaattoqarpallu sillimmasiisarfiup aqqa policenormulu.

Imm. 5. Paasissutissanik allanik suliap suliarineqarnissaanut atugassanik Kalaallit Nunaanni Naalagaaffiup Sinniisuata aamma Civilstyrelsiq qinnuteqaateqartoq pissarseqqusinnaavaa.

§ 8. Nalunaarut manna atuutilerpoq ulloq 1. januar 2015.

Imm. 2. Qinnuteqaatinut 1. januar 2015-mi kingusinnerusukkulluunniit suliarineqartussanut nalunaarut atuutissaaq, eqqartuussisulersuut nammineq aningaasartuutiginagu qinnuteqaatigineqartoq ulloq taanna sioqqullugu naammassineqarsimappat.

Imm. 3. Kalaallit Nunaanni nammineq aningaasartuutiginagu eqqartuussisulersuussineq pillugu nalunaarut nr. 1242, 22. oktober 2013-meersoq atorunnaarsinneqarpoq. Taamaattorli nammineq aningaasartuutiginagu eqqartuussisulersuussinissamik qinnuteqaatini 1. januar 2015 sioqqullugu inaarlugit suliarineqartuni malinneqassalluni.

Justitsministeriet, ulloq 2. december 2014

METTE FREDERIKSEN

/ Astrid Mavrogenis